

四庫全書

集部

欽定四庫全書

集部

海陵集卷三

詳校官庶吉士_臣李如筠

主事_臣呂雲棟覆勘

總校官編修_臣王燕緒

校對官編修_臣盧 遂

謄錄監生_臣王爾熙

欽定四庫全書

集部四

海陵集

別集類三

宋

提要

臣等謹按海陵集二十三卷宋周麟之撰麟之字茂振海陵人紹興十五年進士中宏詞科任起居舍人歷擢兵部侍郎直學士院給事中知制誥翰林學士官至同知樞密院事宋史藝文志載麟之海陵集二十三卷與此

本合前有淳熙癸卯周必大序亦稱其子準哀
遺稿得二十三卷蓋猶舊帙序稱其久官於
朝故其詩文因事而作者少集中內外制詞
殆居其半今觀其集非惟贈答唱和寥寥無
幾即奏議奏劄亦多不關軍國大計蓋其珥
筆禁廷坐司綸誥不出國門而躋通顯與王
珪約畧相似而文章嫺雅亦猶有北宋館閣
之餘風非南渡諸家日趨新巧者比未可以

專工儷偶輕也別有外集一卷其中中原民
謠十章盛陳符讖誇宋詆金又前後凱歌三
十首虛張虞允文瓜洲采石僥倖之功殊為
過實詞句亦多鄙俚不類麟之他詩考諸宋
志亦無此外集一卷之目殆其子諱而削藁
後人又掇拾附存歟謹削之而附訂其謬如
右乾隆四十六年三月恭校上

總纂官

臣

紀昀

臣

陸錫熊

臣

孫士毅

總校官臣陸費墀

海陵集原序

本朝沿唐舊西掖掌外制北門掌內制謂之兩制而非
侍從近臣之通稱也太宗時四方砥平人才輩出專以
是處文學器識之士禮遇非他官比二府有關率於此
取之惟參知政事蜀人蘇易簡尤被眷獎其自兩制入
中書猶未強仕淳化二年御飛白書玉堂等四字以賜
至今號為北門盛事災祚中興時則有吾宗樞密公茂
振以雋明之才辯麗之文受知上皇人皆以蘇公遇太

宗為比年踰三十由館閣兼掌書命其後真拜掖垣入翰林三遷為學士每一制詞出學者爭相傳誦天子嘗褒諭云卿久掌內外制中外士大夫咸稱得代言之體紹興三十年復大書玉堂二字賜之其視淳化若合符節公先世亦蜀人也後徙海陵登科者踵相躡所居號叢桂坊世有顯人至公遂大用可謂盛矣公薨嗣子準裒遺藁得二十三卷而內外制殆居其半蓋久官於朝故其他詩文因事而作者少然溫潤精切鼎鑪可知向

使天假公年主盟斯文則述作之富雖至于百卷可準
刻意家學數以序為請予與公同宗同朝不得而辭公
諱麟之茂振字也淳熙癸卯正月十日周必大序

欽定四庫全書

海陵集卷一

宋 周麟之 撰

賦

檻泉賦 并序

陽羨祖塋之左有泉正出蓋詩所謂鬻沸檻泉者也暇日往觀感而賦之

君山之陽大城之阜松楸城乎其中有泉出焉于蒼龍

之首隱若靈湫豁若睥井吹波若魚目沸滴若湯鼎吁
此何水也若是其異乎山人告予曰維山之顛峩峩巍
巍三峯環峙中窪如卮萬斛之水瀦而為池蛟龍之所
蟠神物之所司水滔天兮不溢旱竭澤兮不虧下灌注
乎山隴之脉上潛通乎天潢之湄淼若陂浸之在望常
未雨而生雲霓泓泓兮淵淵行地中兮冥然值冲秀之
所萃乃奮迅而出焉稽之古詩是名檻泉其正出也萬
竅互發蘊淪洄漩迸澄沙之金碎激浮漚之珠圓吹噓

乎管灰之飛眩轉乎風蓬之旋其洩流也澗道委蛇如
玄雲之觸石遏流不平而鳴鏗鏘乎佩玉之音悠揚乎
宮徵之聲擁山川之秀潤朝鬱鬱之佳城若乃陰伏陽
亢害於有秋萬壑源斷千畦塹浮火雲晝燎燭龍夜游
山岳焦金石流則是泉也其澤涓涓其聲濺濺走蜎縵
於百里溉稻秫於平田其羨流餘浸猶足以已道渴而
灌蔬園也出山隈踰南阡斯前抵于大澗之濱而下會
乎東瀉之川則其澤物之功宣淺淺哉予乃撫然曰夫

天下之水殊源異族注川曰谿注谿曰谷仄出而泛則
為汎懸出而溜則為沃湧輪口而凌空則為汾陰之瀦
下萬仞而曳練則為匡廬之瀑弱水則鴻毛莫載湯泉
則不火而燠或止或行或見或伏各隨物以賦形紛莫
數乎衆目茲檻泉之盛沸不繫見于編牘豈先德之涵
潤故於此發長源而兆吉卜也因相與植杖而坐挹泉
而飲之且歌曰泉之流兮流祖之德肆其後兮沐靈澤
泉之清兮為文英泉之涌兮騰仁聲世世兮承休與茲

水兮同流

詩

郊祀慶成

紫極三階正黃宮一氣旋迎陽周吉土練日漢甘泉考
典陳商輅占祥察舜璿朝冠紛璀璨齋幄湛壇蜎荔席
方顯若油雲已廓然瑤源尊始祖絳節從羣仙碧瓦霏
煙外雕梁麗日邊大音諧美樂芳薦列嘉籩默喜雲孫
燕深期鼎祚延六虬紆制蹕九廟闢崇筵鬱鬯香稗熟

芝楹瑞葉連醇犧登碩俎肅倡被朱絃孝奏靈咸格誠
存禮不愆清晨登玉軼綵仗揭龍旃虎旅羅三衛蜺旌
亘百塵展容趨泰時哀福對蒼園宸坐張皇邸帷宮駕
采椽鼓鐘傳禁漏星月粲高躔獲畧車迴斗熒煌衮象
天華文金擢秀雅奏玉鳴銷虛次停垂佩登壇儼奉瑄
蘭生芬獻竿電燎鬱升煙氣晏樵蒸焜天澄境落褰涓
成均拜昨扑廢趣摩肩鳳蓋端闌敞蠅書惠澤宣自欣
千載遇叨貳六卿聯簪筆琬輿上扶圭繡黼前獨多親

日表敢後贊雲篇帝德惟天大臣心匪石堅願言陪虎
拜寶歷萬斯年

太廟觀芝草

九廟寧神藹德馨煌煌又見產芝英香凝薦掌椒蘭潤
色映雕梁日月明紹復祖宗全達孝感通天地契精誠
試披瑞牒占休應看取皇家萬葉榮

曉開疏屏望榮光仰見威靈燭下方二本同楹真盛事

三年疊秀是殊祥好圖瑞采增旗幟

二十五年太廟芝
草生是歲郊祀臣

乞依乾德中太祖親郊作三瑞更誦靈華續樂章

頃歲臣寮

旗故事特製靈芝旗有旨從之

嘗請以太廟瑞芝播之樂章拜舞共陳歸美頌喜浮春殿九霞觴

苦熱行

君不見浣花老翁初作掾觸熱簿書塵滿案坐曹束帶
總不能但欲赤腳踏層冰又不見青蓮居士金門客懶
搖白羽巾挂壁有時裸袒青林中只知露頂洒松風二
子英規凜千古筆奪造化驅風雨如何避暑如避仇叫
呼競作驚人語是身本與天地同要當捫腹無弗容世

間冷煖翻覆手焉用夷隘惠不恭我方窮居度炎熱火
雲爍山金石裂一讀清詩百念空炯若冰壺浸明月

憂旱

老農病旱如膏肓汲井灌秧秧已黃湖田半作龜兆圻
河渠斷道不可航救旱不必焚巫尪當去民害烹弘羊
嗟哉銷變此不務龍川佛舍徒祈禳中興天子食不遑
側身感天天與祥需然坐待三尺雨擬賦雲漢歌宣王

讀戰國策

從人為從六國強橫人為橫六國亡悲夫不用損秦計
徒以委肉強虎狼一朝秦甲下函谷指揮韓魏如羣羊
坐令不費一隻矢山東千里無金湯我窺塵編三太息
諸侯自覆非秦力紛紛二百四十年說士遊談空滿籍
我將西上弔興亡南山自有能言石

秋日坐寐覺而有作

南國逢秋色西風擾客心久間安飲啄多病廢登臨壁
倚青藜杖窓橫綠綺琴無魚甘糲食有酒任孤斟地僻

千山瘠人稀萬籟瘖懶同牛卧龍倦劇鳥歸林紙閣居
容膝繩牀坐整襟縮頭須爾伴便腹莫吾箴俛仰三眠
柳徘徊五戲禽忘形初隱几得趣漸歌簪不假仙遊枕
寧須女抱衾乍疑身栩栩已覺息深深白鳳才難繼黃
梁事可尋有人呼晝漏何處起寒砧短夢遽然覺斜暉
慘欲陰桂開香吐粟菊認藥攢金磨熟雙旗茗爐殘小
辦沈感時思別墅開戶見遙岑自別堯庭邃俄驚墨突
黔背無三甲起頭有二毛侵咎往眉難炙言歸足尚吟

金少隱集卷一
靜忘波洶洶老諳歲駸駸幸得安心法聊為擁鼻吟黑
甜誇勝味黃落寄餘音猿鶴休相怨萍蓬自不禁却愁
宵寐少卧聽竹蕭森

雙投酒

君不見白玉壺中瓊液白避暑一盃冰雪敵只今名冠
萬錢厨此法妙絕天下無又不見九重春色薔薇露君
王自酌觴金母味涵椒桂光耀泉御方弗許人間傳向
來我作金門客不假釀花并漬核日日公堂給上尊時

時帝所分餘瀝一朝釋珮投江村卻訪田家老瓦盆道
院丹泉灰腳重官爐玉友糟頭渾有酒如此寧不飲但
賦獨醒招楚魂錦谿昨夜秋風入梧葉雨殘溪水急呼
奴為我挽飛流滌氛燎薪炊玉粒奴言新釀良未宜此
間寒燠來無時雙投舊法酒經載今焉可試君無疑初
觀白醕寒漿溜再加麴米成重酎色如竹葉照人明香
似蘭英和露透妻孥一笑醞竿空所恨無多纔數斗嗟
予性與禮法疏況此掃軌甘窮居肯學鴟夷隨後車不

煩騎驢驥子扶焉用拊缶歌烏烏一觴一詠聊自娛

飛來峯

西域嶄巖羣玉峯懸崖萬丈穿玲瓏世人不識真鬼工
夜半躍起隨雷風天與西湖作奇觀竊然飛墮羣山中
海風吹雨萬壑暝往往密有雲相通遙望煙鬟出林塢
重巒面面青蓮宇孤雲起石風生泉游人六月不知暑
世傳飛來我亦疑摩挲蒼壁心更悲當年禁園山水遠
艮岑一石須人挽無人把酒酌山靈飛入君王上林苑

賦張參政四老堂

散策相從倚玉鳩不須更伴赤松遊林塘在眼供舒嘯

花鳥催詩好勸酬一座幾盈三百歲

公四兄弟年皆六十餘

四翁

宜壽八千秋堂前風物如伊洛尚欠香山與石樓

西望斜川烟靄低荆溪東下泛清漪夜來風雨秋懷共

春草池塘晝夢遲江左便傳花萼集曲中休奏紫芝詞

安車不日聯鑣至銀角桃枝上玉墀

呈鄆人李簽判

錦江煙水春茫茫錦城遊宴歌舞狂酒酣緩轡踏花去

尚說當年先侍郎

吾家本郫人先侍郎仕蜀日芙蓉堂詩有踏花歸去馬蹄香之句

後

來游宦家因徙子孫不復歸桑梓世居淮海二百年路

隔關山七千里兵戈南下風塵昏衣冠渡江黃屋奔淮

鄉幾作邊成地叢桂舊第無一存

海陵舊居名叢桂坊

我從避亂

梅花塢釣月眠雲拉巢許爾來又卜南郭居自笑飄萍

無定所見君襟韻真謫仙從來遊戲壺中天眷言我祖

舊同閑邂逅笑語心豁然平生行李遍方外南逾五嶺

入蒼翠脫靴未屈力士手探囊已壓髯奴背為歎干戈
何日休浮家泛宅江海遊丹砂鍊就葛洪鼎茶竈行隨
魯望舟天涯一見傾蓋舊青城猿鶴知存否會當叱馭
過邛郫相從却飲鄆筒酒

呈伯父元仲二首

我伯氣吐虹貫日干文光胸中有和璞發揮見文章筆
追羲獻風句壓曹劉牆平生太古心孰得窺行藏人間
富貴味掩口不一嘗方朔飢卻死次公醒而狂方寸不

受折養此百鍊剛江湖五十年飄飄曳征裳晚歲一區
宅欲並幽林塘浙東山水窟選勝方徜徉蘭溪得佳致
行築鍾山堂自顧世路險機穽寧易防俛首吾不能高
卧庸何傷貧賤苟自得麪糗皆膏粱願言守此志鵬鷄
聊相忘

干戈十年餘荏苒百憂至誰憐齒未壯遽失綵衣戲捫
心天不聞空下千斛淚藐然一星孤未忍隨以逝雨濕
新松楸塵生舊鞶帨奈此愁絕何況復形夢寐蕭蕭風

樹悲此恨豈有既念昔韶齒中從公識奇字一從江淮
別歲月不復記公尋武夷春我友頤山桂此來忽相見
再拜只流涕忽忽悅情話恍若已隔世先人有遺經風
夜焉敢墜餘生倘未殞肯負平日志但恨不及親臨風
一獻歎

寄伯父元舉

我家百笏門族望甲鄉國堂堂六世祖名在碧落籍人
曰吾故侯善政光古昔後裔聯簪纓北原蔭榆柏里居

百餘年世出二千石當時叢桂中鳴珂動城陌變故忽
相仍流蕩兵火厄一經焚劫餘故里半荆棘奔騰豺虎
羣逃避天地窄十年湖山游幸不死鋒鏑朝穿雲麓青
夜釣月溪白間關度陽九闔室僅安適遽嬰風樹悲呼
天淚橫臆坡陀東龍岡悵望隔窰窰

先塋在陽
羨東龍山

故鄉渺

歸期異縣悲久客北轅吾未能遼絕江海隔思我伯父
賢一別幾更厯寇至獨不去巍坐空四壁高標揖夷齊
九死出焚溺居為一鄉望後學所矜式泮水修復初儒

盟首開席我獨隨風蓬孤陋阻規益明年秋鴻飛槐花
動行色庶遂升堂拜情話輸悃悞詩成喜不寐興逐飛
天翼

答宋子開

冀北百馬一駉馱沅江之鼈九肋稀海邑千室士半之
異材傑出今其誰有客有客氣吐霓行年五十縫掖衣
青鞋白帽鬚未推筆下妙絕黃絹碑句中參徹後山詩
邂逅一見秋雲披立談展盡胸中奇如刮眼膜如起痿

便許握手論交期看君有蘊未一施杜門却掃甘幽棲
草樹蕤蕤含奇姿兩堂對啟白板扉我時剝啄叩庾度
君出迎笑喜見眉晴窓坐隱花影移茗椀未盡爐香遲
手弄麈尾風颺颺主人得意客忘歸嗟予懵學安所師
矧復少也逢百罹尚賴先德流餘滋遺編爛爛星斗垂
墨猶未乾吾忍窺梅花一詠偶弗遺君能鑒賞了不疑
惜哉不與君同時生前未免俗子嗤身後有此名流知
嗚呼吾意其何悲

上王吏部

人物南州望風流一代英風傳天上譽早夢月中名車
載三千牘鵬飛九萬程向來辭泮水端合上仙瀛接武
虞廷邃含香漢殿清漸看丹極近首冠列星明準擬陪
三接周旋位六卿鑑分金背重橐並紫荷輕未見恩綸
出那知謗篋盈去朝雲路杳歸侍綵衣榮地借微之竹
樓吹子晉笙赤心何所負白眼不須驚自顧銜恩厚親
逢較藝精妍媸歸藻鑑高下見文衡夢絕懷蛟異詞非

吐鳳成賦能窺小小經漫說鏗鏘誤玷春官籍終慙月
旦評搶榆幾類鷦出谷僅同鶯志慕青錢士名參玉筍
生別深秋鶴怨歸問海鷗盟未作河西尉聊為江上行
夜沈灘月釣曉壓隴雲耕歲暮人初返天寒雨未晴久
稽從杖履且復卧柴荆後見含深恧微吟寫至情佇聽
宣室召鳳閣繼家聲

見張運使郎中

風度顚顚白首郎清朝趨奏久含香東南德望龍津閣

甲乙科名鴈序長使節不辭驩駕遠卿家重見戟門光
願公早入承明去一試囊中活國方

野鶴摩雲萬里心一枝聊復寄高林愁邊舉目江山異
客裏登樓歲月深長鋏誓為知己用短檠空伴讀書吟
龍門不拒通家子應許來聽正始音

送王時亨舍人帥蜀詩二首

煌煌大筆照坤維忽見文星下紫微萬里江山渾改觀
九重紳笏更爭輝占松不假刀形夢換馬端期鵲赴飛

試問鄆筒故鄉酒路人應唱踏花歸

一從鴈塔綴英游又見功名得志秋
丹闕萬人窺榜眼碧幢千騎擁遨頭
錦城日暖惇鰥舞玉壘煙深鎧仗收
它日中和聞善政一琴寧復久淹留

和陳大監

君不見漢業已定猶勁兵白登坐困師
無名席門先生計無誤黠虜不得窺平城
論功自合班人傑蓋世拔山威盡折漫誇
勲業是韓彭我出六奇秦項滅後來漢道

如衰周德尊一代陳太丘二方相繼厲名節不顧羔鴈
真善謀雪霜貿貿年芳改凜凜松筠見風采豺狼當路
狐狸號獨有孤鴻橫四海至今逸韻傳清商雲和之瑟
絃高張耳孫磊落天下士大才有出皆其長胸中萬卷
饒丘壑鮮取遺音叩寂寞一朝解組又彈冠出處無心
付天樂我輩等是風月人昔也同閑今為鄰不妨對語
味如蠟擾擾萬事從橫陳

再次韻為謝

公詩律嚴如用兵江淮草木先知名少當千人掃文陣
晚策百勝攻愁城詩壇老將天下傑筆倒三江流萬折
時將妙句吐長虹李杜文章光不滅由來事業師伊周
詎止博識窮九丘星列丹墀藹華望月昇金掌陳嘉謀
脫冠歸來雙鬢改任爾功名爭好采揮絃月下奏高山
擊楫波間哦小海方今祝網仁如商聖賢相逢治具張
鶴書旁午詔多士不以椶闌遺寸長如公豈得栖林壑
焉問曉猿驚索寞歲晚方諧魏闕心官間不減商山樂

湖上春來花惱人我不憂貧依富鄰朋友膠漆古來事
願言握臂追雷陳

趙見獨示所業并詩次韻謝之

沅江九肋稀端問學不學向來屠沽輩過眼褐寬博如
公負竒才尚隔雲津躍昔吾先隱君早識麟一角聯翩
錦囊句紆餘仍卓犖千載埋玉悲孤芳竟誰擢別來二
十年歷歷記前作賤子更百罹素業守彌恪餘輝忽振
耀如獲西山藥清夢到鈞天求音叩寂寞中宵對蓮炬

何以稱光渥辱君瓊瑤篇重愧鼠呼璞大軸闕洪源
湧千澗落一洗胸中塵豁若春雲廓

以珠子香建茶寄皖公山馬先生

筠谷珠璣北苑春寸誠千里託靈芬為投白鹿岩前客
何日容分半席雲

送台道人

我祖來從錦江曲尚憶郛筒醉春淥輕衫拂石踏花歸
近傍青城結茅屋

余家本郛人先侍郎仕益蜀王為翰林學士有拂石坐來衫袖冷踏花歸

去馬蹄香之句傳于世當隱居青城山

子孫散作淮海居奕葉英風凜相

續不惟叢桂競傳芳時有高人更趨俗

余家登科者二十餘人海陵號

所居為叢桂坊

或隨羽化附青蛇

伯父遇呂公年未冠尸解

或避詔徵稱赤

局

伯祖得道宣和間累詔不起封守靜處士自稱上天赤局左僕射

我生本是林泉人

失脚塵中困羈束每逢蜀士話維桑便欲攜筇訪前躅

道人家世出巴西萬里江山見眉目笑施砭石起膏肓

坐察形神窮倚伏我席為門君荷旃相見忘情謝榮辱

幽香小鼎暮烟橫濁酒一盃春蟻綠此身多病經百罹

只合紉蘭與餐菊休論燕領覓封侯莫說鳶肩騰火速
我有風懷就問君何時一飽顏公粥今日君行跨奔鹿
欲下鵝洲穿柳谷他年願結白雲期與君同看金峰鵠
送僧大通還山一首

三年虎卧白雲關誰念窮猿失故山野客已拚花自落
道人全與鶴俱還龐眉皓首雙松老白氈青絲一室閒
何日得追塵外趣聽君擊鉢翠微間

戲呈珉禪師

我來何幸識支郎百丈峯頭寶月光質薄自憐非燕頤
途窮誰信是龜腸漸看鬢底千絲白敢說眉間一點黃
坐見錦溪秋水闊不知何日理歸艎

海陵集卷一

欽定四庫全書

海陵集卷二

宋 周麟之 撰

詩

終風行

北風駕寒萬竅號聲如八月江上濤又疑大鵬上青霄
南溟水擊搏扶搖昆陽陣敗虎豹嗥撼城飛瓦千兵逃
焚輪夜起狂終朝直憂卷屋掀重茅我居門巷如荒郊

衾無續燭裘無羔苦寒獵獵吹縵袍笑引藤樽漱濁醪
不妨高卧醉陶陶夢騎天馬騰長颺睥睨玉臺閭闔高
風聲詩興兩鬪豪醉中一掃白雲謡

望秦川歌

明皇幸蜀一日登高山望秦川謂高力士曰吾
聽張九齡言不至此馬上吹笛為曲號謫仙怨
今亡焉因為八章以申其念舊之意

長安回首戰塵中馬背行吹一笛風寄恨翻成謫仙怨

始知深負曲江公

錦囊留得玉環香
不見佳人空斷腸
北望秦川烟草滿
尚疑飛燕舞昭陽

向來花萼弄春輝
曾把寧王玉笛吹
樂事已隨風燭過
如今橫笛不勝悲

蜀山春動錦江流
水綠山青總是愁
愁絕不堪山上望
無人解與月宮遊

雨聲鳴棧不堪聽
盡日穿雲上杳冥
羯鼓催花渾不記

金少巳石全言
卷二
曲中空唱雨霖鈴

漁陽千幟掃空來
滿目妖氛鬪不開
為問玉京何日復
傷心黃屋幾時回

煙霞縹緲認驪山
遠想樓臺紫翠間
尚欲神遊太真院
不知身過鬼門關

阿瞞按舞長生殿
妃子洗粧端正樓
此去恰如巫峽夢
相望千里事悠悠

愁懷三首

雨沐秋容淨雲橫天宇高溪流走城塹木葉下亭臯興
引淵明酒寒侵范叔袍清愁不能已高枕誦離騷
燕去簾帷靜蛩鳴機杼忙淒風萬籟息夜月一奩光自
喜襟懷豁寧為景物傷幽窗有佳致坐挹桂花香
江遠蓴鱸晚逕荒松菊寒近知秋信好更覺旅懷寬遠
杵風催急橫琴夜向闌飄零莫惆悵吾道久艱難

觀梅

春來物物未關情只與寒梅有舊盟芳信已催詩興動

幽香還釀客懷清月摹瘦影橫窗淡雨浴疎花照水明
却憶去年花下飲共持盃酒泛飛英

和元革叔無悶齋

家在濤江欲盡頭結茅寧為樂休休達人自得一經趣
游子空懷千歲憂坐對聖賢唯酒適身憑形影以詩酬
公今非遜元無悶要把韋編續聖丘

初除西掖士華兄以詩贊喜次韻為謝

向來歸卧白雲邊忽拜君王詔墨鮮誰借羽翰超弱水

又隨簪橐過甘泉酒同今夕兄酬弟詩比當年聖得賢
潤色正須燕許手小儒那有筆如椽

西園堂榭落成種植畢工偶成口號十首呈叅政

張公

遯叟高眠石磴雲鷗夷長泛五湖春爭如畫錦延華萼

同作商山四老人

公以四老名堂

華堂迴出複城高更買鄰園徹古壕要展渭川千畝竹

賸栽錦里百根桃

鈎簾待燕春風裏把酒酬花夜月前更啟西窗納清景
煙光如畫擁斜川

城外青林可當山橫雲翠靄鬱孱顏虛堂一枕林泉夢
如在煙霞縹緲間

林花倒影落清池池面春波泛綠漪更築小橋亭上去
便成家世授書圯

小谿深樹鹿呦呦野鶴無聲蕙帳幽風月滿亭供笑語
依然不減醉翁游

草木青歸二月天
川原明媚發春妍
臨流忽見寒梅影
皎若凌波洛浦仙

花梢日上雨痕乾
冉冉香風破嫩寒
眼底便知紅紫近
山茶先放鶴頭丹

幽叢灌木便成林
準擬炎天百步陰
應許春禽樂餘蔭
鷦鷯穩寄一枝深

水流映帶清漳宅
野望遲迴半月臺
只恐宮鶯阻陪賞
日邊便有鶴書來

與蘇州守十詩以兵衛森畫戟燕寢凝清香為韻
吳山濯濯烟鬟青湖水練練光遶城城中主人目如電
爽氣坐納山水清千門鳴絃夜月靜四野垂穎秋雲平
試占古語詠侯德一賢可當百萬兵

蘇臺屹立層霄裏環望水雲三百里十年草綠春城荒
麋鹿肆游歌舞地公來一顧風物新華屋下蟠烟靄翠
正須滿意事登臨早晚中臺拜英衛

館娃宮院秋沈沈採香芳逕花委金吳王舊事久寂寞

此地猶懷千古心黃堂高興動樽俎三百畫橋絲管音
吳儂但識宴會樂那知遶屋棠陰森

城西連施楓橋夜城東接舳閫門下細聽來往棹謳聲
一一歌呼頌仁化爾知德政並龔黃我慕風流到王謝
會當臨景賦新詩寫得吳中有聲畫

洞庭雨斷魚天碧松江月明波動色剪橘霜包照座黃
鱸雪縷堆盤白秋到湖山最佳處此景付公天不惜
英名自是龍驤家更待高閣立幡戟

相門舊列名臣傳挺挺遺風眼中見遠覽初褰賈父帷
仁風已滿袁宏扇坐看詔璽天邊來袖章入對金鑾殿
好追樂事醉昇平日奉宸游玉津宴

一方靜治民安枕天子英明用人審慈厚薰然布帛溫
威明皎若冰霜凜幹旋妙手經畫餘貫朽如山粟填廩
禁闥還容汲直歸淮南定報姦謀寢

六飛南駐開陪京朝廷恃此為金城元侯卧護股肱郡
去天尺五日月明誰憐游子歲一過欲往不得如流萍

今日西風要留客好山橫道煙光凝

青衫飄泊江海生十年蓬底載我行每逢勝地一長望
江山舉目難為情登樓幾作仲宣賦在野猶帶倪寬經
邇來困甚幾執熱願焉一濯秋風清

蓋公論治齊相堂穆生酌醴元王觴古人好士乃如此
名重千載尊而光我公風度冠今昔龍門冠蓋春雲翔
微才詎敢充旨味藥籠庶容芝桂香

辛酉大雪戲成十詩以千山鳥飛絕萬徑人蹤滅

為韻

北風夜捲地凍雲曉黏天黃竹歌未終飛霰集我前森
羅崑山壁零亂淮夷墳縛賊懸鉅城安得兵三千

跨驢遊灞橋策馬阻藍關詩人自清苦逐客何當還我
獨擁敝繭高卧環堵間黃精已無苗斲雪思舊山

松桂亦華顛瓦石背玉表造物不作難夜半月出皎書
窗互照映甕牖驚易曉舉頭忽彌望萬里絕飛鳥

複帳麝香篝綺席羅妓圍焉知華門子清哦袖鵲衣臘

白三日寒遽使晝掩扉愁思已如許共作風絮飛
舊聞沙漠寒磧鹵一丈雪誰憐牧羝人白首持漢節朝
廷北顧憂歲晚不忍說寄言上林鴈何事音信絕

堆盤水精鹽翻匙雲子飯年年六出花不必以瑞獻浪
言平地尺貧亦非所願愁無儋石儲安敢擲百萬

林梢宿鴉翻未覺烟樹暝瀟瀟打窗聲慣向雲屋聽冰
結積已深風收舞初定凌晨出門喜折屐印樵逕

吾無千金裘為博麴米春牀頭臘甕熟漉以淵明巾飲

少輒至醉醉眼迷天垠衝寒望南巷不見披氈人

千騎射獵軍一簑垂釣翁寒江與曠野得意應無窮顧
我俱未暇緩步聊倚筇惜此連璐白浣以雞犬蹤

佛衣珠唾飛撼樹縞裙裂巡簷索梅笑敲枕聽竹折念
此積雪寒憂世心愈切夜分耿不寐風燈半明滅

自南山歸口占上王閣老

湖上清遊樂有餘玉山未倒不須扶後堂深處無人到
尚許鴟夷託後車

日高風軟不生塵十月湖山暖似春
綠綺抱來人不至
幾時容我喚真真

叅政大資毗陵張公輓詩十首

淝上英遊遠江南慶系長二卿雙戟貴七葉一門光
早負鵬天闊先分桂籍香中興誰第一勲烈在旌常

德望三朝老才華一代宗偉名高附鳳餘事富雕龍
異刻驚黃玉仙遊問赤松忽騎箕尾去雲路杳無蹤

一馬龍驤後中朝草創初秉樞登政路扈蹕擁宸裾像

入雲臺畫名標玉府書太平資舊德不及駕安車

出入紆宸眷龍光溢帝閣賜書奎畫爛分劑寶奩存尚
擬陪三接俄悲築九原遺忠當厚報豈但輟爪恩

自領一麾出旋更五鎮雄政追棲鳳迹民戢帶牛風鑑
水恩波外西山爽氣中棠陰隨處是繞屋自龍蔥

晚歲游真館分符蒞別京九關留管鑰千騎按屯營天
上金甌覆江邊玉節明傷心遊宴地悵望北山橫

四老延清會連年樂故鄉譽騰花萼集光動德星堂今

獨三荆茂居然一鑑亡慶流知有在蘭玉藹遺芳

綠野裴公趣東山謝傳心林泉幽夢斷花柳舊谿深淪
茗風生腋飛觴月滿襟向來親几杖猶想聽高吟

久玷平漳館叨陪北海尊軒騰期遠到刻苦記前言穉
榻恩難報常經業自存孤蹤初筮仕此志與誰論

憶昔春官試唯公季子俱別來成永訣返哭慟諸孤忍
預吹簫列空懷解劒趨新阡閔長夜雪涕墮平蕪

致政大夫胡公輓詩五首

赫奕三公冑高華百笏門義風傾里社名德老丘園不
起東山卧空餘北海尊已隨飛劍逝猶記刻舟痕
西帥乘遲日趨庭正妙年飛書騰白羽曳綵汎紅蓮晚
伏追風驥長嗟墮水鳶卷舒安義命何恨及重泉
燕寢追遺事沈疴歎積年未扶鳩杖起已報鹿車懸顯
服登三品榮名謝九遷英姿寧復見歸伴玉臺仙
碧落承先訓青冥屈壯圖珠懸三樹秀鑑舞一鸞孤逝
水嗟何及佳城讖不誣江山蟠秀氣此地卜青烏

末緒慚非偶，孤蹤託契深。
委禽申舊好，奉屨負初心。
已矣升堂拜，潛焉雪涕吟。
四郊烟樹慘，引紼墮哀音。

夫人孫氏輓詩

嬪風合冠女圖中，禮法能兼郝與鍾。
自許夫知黃鵠志，曾看女拜紫鸞封。
高堂把酒同嫺睦，燕坐繡經樂始終。
千載管彤書盛事，只今門有壻如龍。

胡夫人輓詩

閭範三從正，家聲兩大餘。
義高黃鵠操，恩疊紫鸞書。
閭閻

治登蘋藻園林映板輿忽乘飛鳳去應傍素臺居

晚歲根塵淨端由志節隆斂身遵七誡彈指悟三空此
日傷朝露何人賦凱風我方司汗簡盍載女師中

舊倚韓康伯高堂坐累茵曩先歸厚夜今又失靈椿族
黨千車會階庭五鼎陳季能當大事無負玉堂人

表兄知府郎中張公輓詩三首

自昔三珠樹如兄最早成握蘭霑騰馥擧桂阻高程健
筆三江瀉英標一鶚橫崦嵫驚電謝坐失劒崢嶸

蓀蓀沅江路猶遲皂蓋臨但疑三甲起那識二毛侵北海樽壘在南園草木深水亭風月夜八詠想遺音

自是吾宗出金蘭臭味同影纓聯北闕抱槃踵南宮去國郵書密還鄉巷轍通詎知生死隔回首一彈中

楊國夫人趙氏輓章

猗蘭奕葉神明胄四德宜家綽有餘盛事可稽彤筆史當年曾夢紫函書子登虎榜朝輝弁夫握龍韜拱殿廬長樂宮中稱萬壽猶思翟茀擁駟車

海陵集卷二

欽定四庫全書

海陵集卷三

宋 周麟之 撰

奏議

論乞修神宗以後寶訓

臣聞書曰監于先王成憲其永無愆詩亦言酌先祖之道以義養天下然則前聖典謨布在方冊後代纂之寶為大訓顧可後哉昔唐史臣吳兢嘗採太宗與羣臣對

問之語為貞觀政要三百年治亂之龜鑑舉不出乎此
洪惟國朝以聖繼聖傳襲一道故亦有寶訓之書追倣
前制發揚光烈陛下紹隆丕緒祇遙燕謀立政立事未
嘗不以祖宗為法臣職在東觀脩纂日厯之暇竊覩祖
宗寶訓自太祖皇帝至英宗皇帝五朝並已成書惟神
宗皇帝以後修纂未備喪亂以來舊本不存將何以昭
示萬世自陛下中興屢降睿旨委官纂次因循迄今未
應明詔憲章祖述庸有闕焉臣愚欲望聖慈申命史館

速加研考以次條類續而成書庶以彰累朝重規疊矩之懿明陛下繼志述事之美取進止

論乞製造靈芝旗

某伏觀國朝會要乾德六年太祖親郊有司請以國初以來祥異著之旗章遂作金鸚玉兔馴象三旗今天子受命中興功光創業化致昇平諸福之物莫不應期紹至近者太廟生美芝九莖連葉此尤瑞應之大卓絕而創見者仰惟清朝潤飾百度當郊禋之歲而帝祖昭鑒

預賜嘉祥其顯赫如此宜令有司考故事特製華旗繪
靈芝之形於其上以彰一代之偉蹟新四海之觀聽昭
示萬世實宗社大慶伏望朝廷特賜施行

論禁小報

臣聞國之有號令猶天之有雷風雷不一風不再號令
如此然後可以鼓舞萬民動則不應無有遠邇罔不是
孚仰惟皇帝陛下自更化以來蠶飭百度鼎新庶政登
用賢雋屏除姦回凡積年弊事固已一切剗革而釐正

之矣方陛下頒詔旨布命令雷厲風飛之時不無小人
譸張之說眩惑羣聽如前日所謂召用舊臣者浮言胥
動莫知從來臣嘗究其然矣此皆私得之小報小報者
出于進奏院蓋邸吏輩為之比年事有疑似中外未
知邸吏必競以小紙書之飛報遠近謂之小報如曰今
日某人被召某人被召罷去某人遷除往往以虛為實
以無為有朝士聞之則曰已有小報矣州都聞得之則
曰小報已到矣他日驗之其說或然或不然使其然耶

則事涉不密其不然耶則何以取信此于害治雖若甚微其實不可不察臣愚欲望陛下深詔有司嚴立罪賞痛行禁止使朝廷命令播之天下天下可得而聞不可得而測可得而信不可得而詐則國體尊而民聽一臣不勝至願取進止

論戒守令遵守成法

臣伏見陛下勵精為治勤求民瘼芻蕘辭輿誦博采兼聽孳孳如不及四方利病至悉庶人得言之士大夫得言

之監司郡守近民之吏得言之此誠有虞闢四門明四
目達四聰之時也陛下求言之意聞之唯恐不盡而天
下之所望者亦如此故邇者士庶上書陳獻利害及守
臣到任條具裕民事進降者甚多看詳者不一然以臣
觀之大要有三或施之於民而民利槩之以法而法通
若此類者固無所疑朝廷皆以次施行矣有行之可以
利民而於舊法及一時指揮或大相抵牾或小有不合
言既不可盡廢法亦不可輕議若此類者臣亦各權其

事之輕重乞從朝廷隨宜參酌可否矣其或自有見行
成法州縣所當奉行而猶申請不已言者猥多覽者易
厭臣每看詳至此謂之無可施行則實有其弊設或一
一申嚴則不勝其繁凡若此者臣今欲並行類聚總其
條目取自聖裁特降明詔戒諭郡縣之吏使之明習條
令固或容私遵守成憲毋致違戾究心夙夜悉意奉行
庶幾使陛下愛養元元廣謀從衆之惠徧及寰宇無一
夫不被其澤天下幸甚取進止

論臣僚奏對令備錄聖訓詳盡

臣仰惟皇帝陛下以天德地業再造區宇見獨明徹聖敬日躋雖古之所謂盛帝顯王無以加此臣頃在東觀以修纂日歷為職因得歷覽陛下臨御以來三十餘年間事業之富謀斷之偉謨訓之大布在方策赫然與日月爭光臣闕天之智狹而戴上之情切嘗考其間所載聖語大抵詳於前而略於後臣深求其故蓋由頃歲左右史多缺起居注不修三省樞密院時政記於聖語亦

或闕略而不致其詳近者陛下總攬權綱修廢振弊更
化之道粲然一新睿謨明訓發於九重密勿之間而風
動乎天下贊襄之輔獻納之臣內外進對之官所得多
矣臣區區之愚欲乞申嚴舊制自今凡與奏對備錄所
聞毋致漏逸使史官皆得以具載功令記時政者尤務
其加詳以此授之國史著之日歷作宋一經襲舊六為
七用傳信千億萬世臣不勝至願取進止

論命令必經兩省

臣恭惟國朝稽古建官分三省以釐天下之務凡有命令則中書省取旨門下省審駁尚書省頒行三者相參而後百度正綱紀舉所以致其慎示不專也然自累朝以來號東西二省為維持政本之地尤重其選或政令之罷行失當人才之進退非宜其中書則舍人得以封繳其在門下則給事中得以論駁皆於命令未行之前而彌縫正救之則朝廷不至有反汗之嫌天下不見其過舉之迹爰自近歲事與舊違當軍興之時則有事

于機速不可以少緩及休兵之後因仍不改用事者又以私意自任廢棄成法故有所謂報者有所謂中入報者有所謂尚先行者有所謂火急者往往皆成定例自陛下銳意更化登用正人前日數者之弊固已十去八九然以沿襲之久狃于故常習熟見聞或未暇一一釐正若便詔旨一頒勅劄隨降所謂給舍者但書押已行之事而已設或事當論奏則成命已付於有司除目已布於中外使士大夫進退失據在朝廷亦為難處甚非

祖宗所以分三省建官之意臣愚欲望聖慈申明舊制
凡命令之出如委非急速不可待時者並經兩省或無
封繳即皆畫時行下庶幾盡蠲宿弊昭示至公復祖宗
之成憲取進止

論禁傳寫先朝實錄

臣伏見國朝會要嘉祐四年史館修撰歐陽修言史之
為書以紀朝廷政事得失及臣下善惡功過宜藏之有
司往時史官書成進入則焚其藁又詔龍圖閣別寫一

本下編修院以備討閱從之然則史事在祖宗朝其嚴
如此豈容輕示人也今者徽宗皇帝實錄成書奏篇疏
上儲於內閣中外士大夫欣聞盛事咸思以先覩為快
臣竊惟先帝之盛德休烈良法美意布在方冊固當廣
其傳以昭示天下後世然其間所載多涉國體與今日
致論有相關者臣愚望聖慈申嚴舊制令副本之在有
司者必謹其藏仍不許諸官司閱借謄寫及臣僚之家
私自傳誦庶可以嚴宗廟尊朝廷遵祖宗之成憲取進

止

論變文格

臣聞文章經國之大業體尚不一從古而然故論世者以是識風俗之盛衰觀人者以此別材智之遠近猶所謂見禮聞樂而知德政不可不察也西漢二百年名儒鴻生蜂起間作雍容揄揚著錄于後則炳然與三代同風唐有天下文亦三變至於美才輩出嚆嚆道與反剏刻偽薰醲涵浸然後天下化之粹然一出于正何其盛

哉我國家恢儒右文列聖一揆取士之制不過曰經義詩賦然或偏廢而獨舉或兩存而並行或兼用而通試三者所向雖異及夫得人則奏賦擅場者無不精其能談經析理者靡不臻于奧累朝名臣悉由此出致治之美固已遠邁前世仰惟皇帝陛下躬天縱之資恢復古道優入聖域猶且博覽經史左右藝文孜孜不倦至其躬御翰墨發為宸章雲漢昭回光被萬物古帝王莫能跂及裁詩樂以侑禋祀則十三篇極風雅之妙記損齋

以明鑒戒則數百言皆道德之辭若此之類殆不可殫
舉士生斯時親得聖王為之師此千載一逢也臣伏見
昨降明詔用經義兼詩賦合二者之長以作成多士永
為定制可謂善矣今肄業之士服勤有年秋試不遠臣
愚欲望聖慈申飭儒臣慎勸士類戒志尚之不一革文
體之未純毋好高以異論相矜毋因陋以陳言自蔽毋
泥迂僻之習而失其正毋縱浮靡之說而溺于夸坯冶
一陶聖風雲靡將見四方俊茂試于有司者無不丕應

後志咸知以體要為宗文弊既除而文格益勝用之以
黼黻一代羽翼六經實斯文之幸取進止

論乞進讀本注音切

臣聞曾子曰尊其所聞則高明矣行其所知則光大矣
高明光大不在于他在于乎加之意而已斯言初止為學
者設也至董仲舒舉此以告漢武帝然後知帝王之學
亦當如是仰惟皇帝陛下聖質天粹自誠而明敏脩之
功純亦不已至於博覽經史固已識其大者舉而措之

天下國家日臻於嘉靖矣而猶不忘講學之益退朝清
燕躬御邇英博延儒流敷繹古藝方且以西漢一代之
史命官進讀是將以因事立教鑒往知今參求化源恢
張國紀固不在於考文藝辨音訓為書生章句之習也
然臣竊謂三代而下惟西漢為近古諸史之作惟班固
為名家讀之者考文義而後見紀事之本原辨音訓而
後知立言之法則然文義或有難見非註解無以發明
音訓或有難知非翻切無以辨證多聞之助或有取于

此也臣不佞叨以讀誦為職苟不能盡心於此或迷金
根之義或誤雌霓之呼以上昧天聽臣則有罪敢陳一
二願從聖訓而訂正之夫服膺曩說疎紊既多蘇晉衆
家剖斷亦尠蔡氏纂集尤為抵牾顏師古激揚鬱滯釐
正睽違援據精詳有補學者然則註解不同臣欲以師
古之說為正漢書舊文多用古字間從假借其類實繁
古今異言方俗殊語本音他切互見其中顏師古備著
科條剖析無滯字涉稍異隨即翻音字協音諧舉當乎

理然則音訓不一臣欲以師古所立為定仍乞於進讀
本內間注音切臣非不知帝王之學志於治道初不問
此區區之言可謂矜小節而闇大體矣然而列職禁近
獻納論思事無巨細皆欲詳審不可苟況執經史以備
顧問乎今茲所陳庶幾下以見愚臣盡心率職之誠上
以副陛下加意典學之美取進止

論乞與四川進士父母年高者先次補官續行照
驗

臣恭覲詔書應得解進士父母年八十以上與初品官封德至渥也自降詔以來凡諸州奏到封母者並經司封關會禮部考驗貢籍俱以施行唯是四川得解進士其貢籍不在禮部而在制置司每得關會禮部必稱無貢籍可照不見得解因依致不放行經今年餘積壓留滯臣今耿見數目有資州得解進士史堯仁等七十四人例未曾上鈔若待取會道途往返愈見淹延欲乞且據遂州保奏文字並與先次放行具鈔給降詔命續下

四川制置司照驗貢籍如有偽冒即行改正庶幾遠方
高年早得均被上賜取進止

論守應之策

臣聞為國者必有一定之計大計已定斷然無疑非徇
一己之見也而千萬人之說莫能搖非苟一時之利也
而數百世之議莫能易此其為利害亦豈必賢知神略
而後知之惟所見者審而通乎事機所持者要而當乎
人情所言者順而合乎天道所操執者彌固則成就者

愈大古所謂聰明賢聖大有為之君建功立事類如此
仰惟皇帝陛下察問如虞舜憂勤如文王總攬權綱綜
核名實則又與漢之宣光比立國於此固自有一定之
計而近之言時事者乃紛紛而不一軍旅之言厲閭巷
之言戚士大夫之言惑厲有所憤戚有所憂此其常態
耳未至於大害治也惟惑之為害蓋有不可勝言者此
無他銳與怠之謂也銳者言兵而欲用怠者諱兵而不
言言兵而欲用是喜功也諱兵而不言是偷安也自講

和以來九廟寧矣東朝安矣赤子休息矣成功著見昭
昭可知陛下方且惇遣重臣厚將信幣以堅永好以釋
羣疑而汨之以喜功之說其可乎渝盟棄好陛下之所
不為也當朝廷閒暇修明政刑振舉綱紀簡練將士此
不可一日忘者陛下方且頒明詔飭庶工懲緘默之風
革驕怠之弊欲人人相與協濟國事而委之於偷安之
說又可乎視陋忽傾陛下之所不取也如臣所見粗有
確論曰守曰應兩言而盡之耳當無事則思所以守有

不虞則思所以應思所以守自治之謂也思所以應不
得已之謂也守之者在我應之者在彼在我者有常者
也惟其有常則雖信睦交通不能廢吾之所以守在彼
者不測者也惟其不測則雖事變猝至不能逃吾之所
以應今夫千金之家固其垣墉常人之所及也若曰吾
與親黨為鄰不吾害也至慢易其固守之具而弗之理
豈不備他盜哉所謂自治者如此詩曰迨天之未陰雨
徹彼桑土綢繆牖戶今此下民或敢侮予孔子曰為此


詩者其知道乎能治其國家誰敢侮之此言自治之為
可畏也獸蹂于田荷戈而逐孺子之所知也若曰吾將
委肉而飼之不汝驅也而獸且噬人矣雖欲不逐其能
安乎所謂不得已者如此漢元康中乘匈奴之衰議欲
擊之魏相不可曰救亂誅暴謂之義兵兵義者王敵加
於已不得已而起謂之應兵兵應者勝爭恨小故不忍
憤怒謂之忿兵兵忿者敗非但人事乃天道也亦言應
敵之不得已也蓋能守者能應之道也守之無不同則

應之無不勝矣守之既固則銷萌折衝人莫予侮且將
無敵之可應焉昔人所謂善之善者理固如此臣願陛
下增修德政厚施於民蓄材俊廣儲侍敦本而抑未去
華而務實明賞罰而一於信振威令以致其嚴考將帥
之能否而為摩勵之方察士卒之勤惰而求養用之實
凡可以為守國之具者靡不恢張而徧舉如此守無不
固矣度山川之遠近視道途之險易孰當其阻孰當其
衝孰為之聲援孰為之犄角孰為之統一凡可以為應

敵之機者靡不素定而默諭如此應無不勝矣守國之具皆可以熟議而應敵之機不可以豫言惟在陛下力行之心識之執中自信而已矣書曰人心惟危道心惟微惟精惟一允執厥中夫人心危而易動易動者浮言之所以興道心微而難知難知者至理之所以隱君人者不過屏衆多之慮致精一之思執中自信則聖人之能事畢矣堯舜禹之治天下相傳以一道不外乎此數語者伏望陛下睿斷不移操一定之計圖守應之策以

為執中自信之道而毋惑於喜功偷安之說則千萬人之衆莫能搖數百世之遠莫能易證諸人事質諸神明臣之斯言庶或無愧惟陛下留神省察天下幸甚取進

止



海陵集卷三

欽定四庫全書

集部

海陵集卷

四至
六

詳校官庶吉士_臣李如筠

主事_臣呂雲棟覆勘

總校官編修_臣王燕緒

校對官編修_臣盧遜

謄錄監生_臣王爾熙

欽定四庫全書

海陵集卷四

宋 周麟之 撰

奏議

論革續降之弊

臣聞傳曰非天子不制度不議禮不考文是一命令之行一制度之立皆當出於天子外乎此者不可以為萬世法也臣竊見吏部諸選引用續降指揮前後不一或

臣僚建明或有司申請皆經取旨然後施行尚慮牴牾之多承用者駁舞文之吏並緣為姦不可稽考今以續降申明條冊觀之乃有頃年都省批狀指揮叅列於其間見今引用亦謂之續降向之修法者有所諱忌至與成法並立今之奉法者但知遵守遂與成法並行應令諸軍使臣到選將佐以上方理戰功而帳前使喚之類皆當時帶甲入隊之人並不許班此用紹興十一年批狀指揮也遂使親冒矢石者反不蒙超異之恩今官吏

陳乞任滿賞則不以限年釐革惟到任賞則不然此因
紹興十二年批狀指揮也遂使勤勞王事者或不在褒
錄之數以理推之誠未為允欲望聖慈申詔有司推本
至公革去前弊使履軍蹈陣者並得理為戰功到任推
賞者不必限以歲月仍令諸選其紹興二十五年以前
批狀指揮如有類此者關勅令所司一一看詳可削則
削毋使與三尺混淆資姦吏為舞文之具天下幸甚取
進止

論定歸正人補官之法

臣聞銓曹素號大有司比年以來各選尤為繁雜若指揮不一承用多疑則吏姦日滋人無所訴其弊有不可勝言者試以歸正官兵一事論之前後有三指揮至今莫能相一據紹興二十八年二月田師中申請指揮應歸正人不曾齎到付身並與減五官補正吏部方且遵用續承紹興二十九年閏六月指揮並令止用歸本朝日所給付身照使其有不曾齎到偽命文字者特與放

行仍出榜曉示吏部已放行又承當年八月指揮令遵
依今降指揮只用歸朝日所給付身照使并照應田師
中申請指揮放行臣竊詳前件指揮若曰特與放行則
不須遞減補正若曰遞減補正則難以一例放行二者
自相抵牾而不可並用明矣今乃兼存之使奸吏得以
出入有司無所適從實為弊之大者若于二者之中舉
其一而行之則又不容無弊蓋一于放行則不問其功
閔不計其久近而例得升進必至于汎濫一於遞減則

久在軍中者其間有立功官資類從毀抹將何以激勸
臣愚欲望聖慈特降睿旨令省部別行看詳著為定令
毋輒更易使士知激勸而不至於汎濫庶幾可以救弊
取進止

論放行從軍人磨勘

臣契勘四川諸軍從軍大小使臣自紹興九年正月三
十日指揮今後許理為資任昨來宣撫司未承上件指
揮已前係奉使宜將從軍大小使臣依格並與放行磨

勘出給便宜付身今來節次陳乞換給考功以當時未
有理任指揮即係侵用宣司月日不該磨勘例行改正
臣竊詳宣撫司隨軍人當時雖未有理任指揮其本司
既以便宜放行若行改正其隨軍人委是在軍供職歷
過月日實非僥冒伏見本選昨准紹興十一年正月二
十五日指揮凡不係大儀鎮等五處立功之人或已作
戰功超轉官資並免追改今欲乞將前項便宜磨勘侵
用宣司月日者依紹興十一年正月二十五日指揮今

後特免追改並與放行換給取進止

論乞置巡綽私渡軍

臣伏見國家自講和以來凡疆場之事專務慎重冀其
警聳近年兩淮罷榷場之後禁止私渡尤為嚴切昨聞
北界屢形於言欲得彼此巡綽陛下敦信睦之好垂宵
旰之慮累降詔旨戒飭邊郡丁寧切至臣頃以使事附
奏于彼有語及此臣當告之以本朝約束甚嚴立賞已
增千緡守臣夫覺察者同其罪又令提刑司旬具結罪

狀申彼亦樂聞朝廷之能順承其令也比者兩淮雖團
結山水社亦欲鳩集保伍互相覺察尚慮封圻曠遠愚
民趣利冒法越禁死不知避監司守臣按行有時巡尉
出入徒為文具如山陽一郡瀕淮界分延亘三百里安
豐濠壽之間地廣人稀豈能一一巡捕禁防少弛或啟
釁端不可不預為之計臣謂不若於兩淮要地各置巡
緝私渡軍專董其事淮東委之劉寶淮西委之王權分
撥屬將之有方略善撫循者各率數千人以往命之曰

巡綽私渡軍兵其營寨旗幟皆以巡綽私渡為號文移則曰巡綽司將佐繫銜則曰專切巡綽私渡事名順理得了無可疑徐于歲月之間漸增人數亦復無害小可以謹邊防大可以固國勢久而習熟又可以安南北之心如臣瞽言粗合時論願下臣章付三省樞密院熟議而行之取進止

論華泉司弊劄子

臣伏見朝廷復置提點坑冶鑄錢司既已參酌舊制條

其事宜措置施行纖悉備具惟是戶部提領所見有吏人十四名發赴本司復置之初不可不察蓋泉司職事散在諸路舊例分遣官屬催督採鑄置局他郡往往有終任不識官長面者每有申請必為吏輩所格舞文弄法為害非輕鑪戶鑄工刊剝殆盡百端規取必至充其所欲然後為之行移官司遞筒積而不拆或盜發以窺事宜或隨意以生沮抑屬官俛首唯唯聽命至以書問與之往來者比比皆是後專命戶部置所提領又以此

輩為諳曉取充吏役事權在內遠近畏之奸計得行動作威福屬官既多差出其弊益甚於前至有一吏用白狀就信州借請數百千則鉛山一場課利置而不問贛州錢院供需不如意則并通判廳例送取勘玩習恣橫略無忌憚若此之類其害甚多今來朝廷復置此司臣竊謂諸路利害士大夫舊嘗更歷此事者不為無人但當精選屬官不必多求舊吏欲望聖慈以臣所奏行下提點司稍汰猾胥矯革前弊以弭吏彊之害庶幾貨泉

流布不至于蠹國害民其利甚溥取進止

論乞給告降下諸州就付老人

臣恭觀元日詔書皇太后仁德天祐聖壽無疆新歲八十應士庶男子婦人年九十以上與初品官婦人與封號並經所屬自陳勘會詣實保明聞奏臣於此仰見陛下極事親之仁崇貴老之化不止為士大夫光榮而已龐恩布濩決于編氓古未有也今庶民薰陶美化安於田里保有壽命年多及格聞州縣間相繼陳乞者甚衆

然其人或多貧民下戶亦有僻處遠鄉終身未嘗識官府者如此類若使依士大夫敘封計會所屬保明遣人齎赴行在于左藏庫送納綾紙錢有省於部伺候上鈔祇請告命不惟無其資而小民亦安知有此道途遼遠往返經營則年老之人需恩後時矣如臣管見欲望睿慈深憐庶老乞令諸州軍檢坐詔命委官保明于所部根刷應年格該恩之人限指揮到日兩月類聚聞奏其合受告命亦乞降下逐州分送屬縣就行給付仍與免

納綾紙錢則天下老人雖微且賤無不實霑恩惠如詔旨矣取進止

論賞罰名實

臣聞自古中興之君惟漢宣帝為得治道之要史臣稱之曰孝宣之治信賞必罰綜核名實嗚呼斯言盡之矣仰惟皇帝陛下以英睿之姿系隆景祚躬履多難式遏寇虐事同乎創業整飭百度躋登丕平功兼乎守成盛德丕烈固已超出百王上矣而臣猶區區以宣帝為言

者以陞下方勵精聽斷剷除宿弊用更化于四方施之於今莫此為急信賞必罰則公道舉綜核名實則真賢興二者國家之先務雖堯舜三代之治不外是而宣帝能用之以救弊願陛下取法焉若夫雜伯術尚刑名此則宣帝之失臣不敢為陛下道取進止

封事

隆興元年十月日具位臣周某謹昧死再拜上封事於皇帝陛下臣聞為天下立事要當順天下之心明天下

之勢然後能易亂為治轉敗為功古聖王所以安中夏御夷狄也莫不皆然舜之格有苗禹之敘西戎高宗之伐鬼方文王之事昆夷宣王之平玁狁率用斯道也下至漢唐其跡異其理同在高文則結和親在武皇則事攻討在宣帝則受朝賀在武德之初則詭臣突厥在正觀之盛則生擒頡利夫豈樂為是異同哉視人心之所向度國勢之所宜有不得不然者耳由是言之聖人應世初無私心也立國本無定勢也因人心之所喜為之

喜故樂民之樂而天下不以為驕因人心之所怒為之
怒故一怒而安天下不以為暴因國勢之強有以成吾
強故日闢百里而天下不以為貪因國勢之弱有以處
吾弱故以大事小而天下不以為怯拱揖指麾之間衆
心樂歸大勢堅定而國家計成矣世之懷偏見執異議
者又烏能伸其喙以撼吾之所守哉紓一時之急收百
世之利凡以此也金人之為中國患數十年矣自阿固
達之起繼之以武奇邁又繼之以東昏王亶又繼之以

岐國王亮迄今葛王蓋五世矣時異事變勢亦隨之阿
固達一舉而吞遼人武奇邁再舉而蹙中原當是時也
掩中國之無備乘民心之久安長驅擣虛所至輒下猝
然有迴山倒海之勢其孰能當之亶之立也命將興師
南牧屢矣踰江南瞰海上而終不得志于我烏珠之歸
師徒耗傷僅以身免士馬物故者大半用兵連歲所失
益多敵知事力之屈可以圖休息也亶與烏珠等謀則
曰吾國天下大讐也使吾子孫一不振宋必報焉則吾

國覆矣不若以恩解之此和好之所以通也和好既通則許我納幣屈我稱藩畫淮為界然後慈寧就養永祐復土南北生靈各安其業聘問往來情文周密自締好以來講信修睦無若此時之歡者使亶不被禍凡我有求無不見聽雖列聖諸陵白溝故地皆可以次第而得之惜乎不十年間肺腑之禍起而亶戕矣至今北人類能言之是則和好之通豈非勢使然乎亮之立也大惡昭著內懷危疑握兵重臣多不受詔朝夕惴惴焉惟恐

討伐之師四面而至我方遣朝賀之使以安之於是遂
偃然南面號令諸國而侈心肆矣狂悖自用以殺為嬉
勲戚諸王翦滅殆盡彼之汰虐日甚我之順事日嚴休
兵歲深生齒蕃息敵知事力之全可以肆大志也亮與
馬欽等謀則曰吾國天下大仇也使吾子孫一不振宋
必報焉則吾國覆矣不若以力取之此和議之所以變
也和議將變則罷榷場詰私渡邊釁橫生敵謀遽發遂
欲割我兩淮要我近輔而又拒我行人不如意掃境

南下王室震蕩危若贅疣自交兵以來生民被害無若此時之慘者使亮不見殺則投筆濟江益無難焉顧其積惡天地之所不容神人之所共憤變生肘腋腹敗支披師徒奔竄惟恐王師之躡其後也是則和議之變亦豈非勢使然乎太上皇帝神靈天亶臨御三十六年躬履多難洞照事幾其于禦戎之道固嘗深思熟計歷試而兼行之矣陛下以大有為之資光奉慈訓嗣守天位治民事神恭儉遜慈德無不周明無不燭惟疆場未靖

上貽宵旰之憂抑嘗有以天下之心天下之勢告陛下者乎自踐阼以來建議之臣有為陛下言戰者矣必曰金鼓一動雷厲風飛則兵不血刃可以收疆土復陵廟活萬姓然王師所至城邑一空破蔡州則殺蔡州之民入海州則殺海州之民奪宿州則殺宿州之民京西陝右往往皆然非所謂拯民于水火之中也繼之以士無鬪志棄甲來歸中原寸地了不可得烏在其為戰有為陛下言和者矣以厚禮將幣以卑屬寓書休兵息民庶

乎兩得然使命數遣有延至于國中而不得伸其志者
矣有見止于境上而不得通其辭者矣以此欲和不啻
如方枘圓鑿之不相入也烏能必其和有為陛下言守
者矣以增陴浚隍遏其衝以積粟聚兵固其本來則勿
與角去則勿與追然長淮東西延袤千里兵少則戍不
周民貧則用不給此者築城壁修堰壩皆取辦于兩淮
之人凋郡遺黎不堪其擾而守未必能固也設欲固守
非經營數年不能就緒大敵忽至其何以支守雖長策

亦未易以一朝集也故欲戰者以和為姦謀為辱國之舉欲和者以戰為危道為殘民之徒而欲守者又以戰為邀功和為怯敵謂和戰皆非萬全之策三說紛然互相矛盾得此則失彼舉一則廢二國論未定主聽未專斯民眈眈然不能自保嗚呼胡不觀天下之心審天下之勢參三說而用之乎昔亶之請盟也太上皇決策講和遣使以先之而邊鄙遂定知其勢可與通也非用兵之時也及亮之敗盟也太上皇出不得已發兵以應之

而敵酋自斃知其勢不可與通也非遣使之時也以此
論之和戰守三策善用之皆足以收功不善用之皆足
以敗事使勢可戰也雖樊噲以十萬橫行李靖以三千
蹀血吾亦為之無不勝者勢可和也如魏絳之五利可
致賢誼之三表可施吾必為之無不諧者勢可守也如
宣帝之罷兵留田光武之閉關謝質吾必為之無不濟
者又胡可外天下之心忽天下之勢區區焉操一說而
自以為得乎臣頃歲出疆至河朔見所過州縣全盛如

故入則人物繁夥閉廛充溢出則耕桑彌望牛馬被野
然後知二十年息兵之效不為無益于斯民一旦敵人
叛盟赤子又復塗炭前冬敵退淮甸白骨如山迹其殺
人之禍皆起於海陵一念慮之間而流毒至于如此豈
不甚可戒哉今敵勢虧矣敵計窮矣兩軍相角而所喪
均兩國相持而其患等欲戰者少不欲戰者多蓋兩軍
之心也欲和者衆不欲和者寡蓋兩國之勢也臣聞之
北人則曰敵中簽發人丁其下莫肯聽命又聞之士大

夫則又曰近敵帥移書于督府致問于廟堂甚有通和之意陛下視人心之所向度國勢之所宜不知所以應之何如哉臣願陛下因天下之心乘天下之勢特遣信使諭以至理告以誠心與委曲評議使知和好之不可以虛詞合又知和好之不可以舊例拘則吾事濟矣或曰比歲而遣使矣其如不諧何其如不見納何臣應之曰使之不諧非使者之過也使之不見納非使者之願也顧當時所以遣使者失其序耳何謂遣使失其序曰

遣使一也而所以遣使則不一也有和議未定而遣者
有和議已成而遣者和議未定則以未定之辭與之通
慶賀有所未修也報諭有所未及也如紹興之初遣韓
肖胄孫近之類是和議已成則以已成之禮與之接
名分有定論也書辭有定式也如講和之後遣何鑄之
類是也自海陵渝盟和好絕矣和好既絕今始通焉故
遣使以議之則是和議未定之時也我方有所議而損
益之未可必又安可遽為賀慶報諭而遣乎其曰賀登

實位則是和議已成矣往年以賀為使者有舊例焉彼復以舊例取必于我又焉得而見納哉今臣之所謂遣使則不然當以審議為名以韓肖胄孫近為例審也者欲審而後交議也者欲議而後定和其本于誠心乎在所審也其出于詭謀乎在所審也名數有未定者乎在所議也疆界有未正者乎在所議也禮幣之厚薄有未齊者乎在所議也為此遣使彼安得不納舉此詳議彼安得不諧和議成矣然後有所賀則賀之有所報則報

之此之謂遣使得其序或曰遣使得其序遂可去兵乎
撤備乎臣應之曰遣使所以議和也和雖可必亦當待
之以不可必使者出境朝廷申命諸將各整其師淬礪
鋒刃振飾旗鎧蓄銳待敵常若兩陣相當者則是使者
之行自不妨治戰具也大軍列屯分據要地修障隧正
營部遠斥堠力控江淮之險則是使者之行自不妨繕
守備也夫戰和守固相須而並用者也善為國者可戰
則戰不為戰而廢和也可和則和不因和而忘戰可守

則守不膠于守而絕和戰之利合而論之則一析而言之則三胡可忽哉昔唐之平賀魯也駱宏義獻計曰安中國以信馭夷狄以權理有變通也噫斯言豈為一時設哉惟陛下博覽兼聽詳究利害觀人心審國勢與時變通權以濟事允執厥中而行之天下幸甚干冒宸宸臣無任戰懼隕越之至

海陵集卷四

欽定四庫全書

海陵集卷五

宋 周麟之 撰

奏劄

除起居舍人辭免劄子

臣今月二十六日准尚書省劄子奉聖旨除臣起居舍人日下供職者臣聞命震驚罔知所措臣竊惟左右史分掌記注密侍殿坳君舉必書當以才選臣器資甚窳

學識非長與纂信書方叨序進擢司載筆實懼超踰仰
丐睿明俯矜誠悃亟追還於成命用改畀於雋能庶協
師言少安愚分

辭免差兼實錄院同修撰劄子

臣仰惟徽宗皇帝以天德地業丕闡鴻化垂衣在御二
十六年聖功巍巍雖非簡策之所能盡而傳信萬世必
有成書纂修之工正在今日然自非一時大雅宏遠之
士兼才學識三長者焉得論次於其間如臣以章句小

儒叨贊書命既無潤色討論之效何有研摩編削之能
重惟不才其敢共二仰祈淵聽亟寢誤恩別選者儒助
成大典非特使事辭之稱亦惟昭名器之公所有恩命
未敢祇受

辭免同修國史劄子

臣今月十四日准勅差臣兼同修國史臣聞命震驚罔
知所措臣聞治史有三長惟其才學識兼之故能綜序
事理勒成信書今者皇運系隆時文載郁肇開史院選

置官僚通修三朝正史事大體重豈臣末學所可與聞
陛下網羅羣才片善必錄以臣近編纂先朝實錄猥當
以僭踰然臣口耳謏聞已試無狀若又濫吹于其間則
不惟虛糜廩稍抑亦清議弗容伏望天慈察臣愚悃收
還成命改畀耆英則載筆之間事辭俱稱將見三聖人
之盛德大業布在方冊炳然與日月爭光庶以仰副陛
下揚鴻烈章緝熙之意所有恩命臣未祇受

辭免除兵部侍郎直學士院劄子

臣今月十九日准尚書省劄子三省同奉聖旨除臣兵部侍郎依舊直學士院日下供職臣聞命震驚罔知所措臣嘗謂詞臣不當以翰墨言功臣濫竽西垣日贊書命曾不能敷宣聖意潤色皇猷坐閱歲時絲毫無補恭遇陛下恢天縱之學以作興斯文如臣瑣才第慚不稱早獲以史事進對忽蒙天慈褒諭謂臣久掌內外制宣力為多中外士大夫咸稱得代言之體今武部清簡當除貳卿仍兼玉堂之直臣仰聆玉音感懼交至既退跼

踏不旋踵而成命已頒欽惟聖造恢洪與天同大而於
臣下尺寸之勞委曲存記如此固當體眷知之殊遇思
親擢之異恩亟踐厥官勉圖報効然臣竊自念典戎華
省寶峻班聯視草禁林匪同寓攝併叨寵渥益重僥逾
伏望皇帝陛下回旁燭之明寢已行之令俯矜愚悃改
授真賢不惟安小己之私抑亦示大公之舉所有恩命
臣未敢祇受

辭免除給事中劄子

臣竊以鸞臺要地朝政所關瑣聞舊儀夕郎為重必得
老成知治道之要庶幾審駁合人言之公如臣者最爾
小才闇於大體鑒坡入直既潤色以非工武部升班亦
素餐而何補更荷中宸之眷復叨左省之除是不獨取
其空言將使之於此詳試顧東求之意甚美懼繇薄之
質難勝伏望睿慈亟收成渙惟君子見得思義故敢效
于循牆若朝廷為官擇人亦何嫌于反汗所有恩命未
敢祇受

乞宸翰劄子

臣伏觀國朝典故淳化二年十月太宗皇帝以飛白書
玉堂等四字賜翰林學士蘇易簡謂宰臣易簡告朕求此數字
卿可召至中書授之它日為翰林中美事字徑二尺餘
以素繒二幅書之龍鵠之勢曲盡神妙曩經變故石本
亦不可復得恭惟皇帝陛下聖筆天縱超冠百王萬幾
燕閒染翰弗輟龍文龜畫刊在翠琰布列中外焜耀羣
目學宮儒館賁飾尤多惟是玉堂密邇清禁而臣愚猥

以末技誤膺簡擢典司內命私心拳拳深有望於奎壁
之光今者輒控丹誠仰干睿聽援淳化故事以為請方
明天子典學崇儒潤色鴻業儻于肆筆之際使得與被
大賜則是中興以來復見禁林盛事儼美淳化垂休無
疆一時詞臣永有榮耀實千載之遇取進止

乞以御書上石劄子

臣近蒙聖恩降到玉堂宸翰臣既拜賜士林歆豔爭先
觀之為快臣伏見淳化中太宗皇帝玉堂御書嘗付宰

臣李昉以下皆得觀瞻學士承旨蘇易簡又會侍從館閣官觀于本院臣欲以今來御書就都堂宣示宰執依本院故事摹勒上石所有侍從館閣官緣近來燕設例罷止乞俟石刻成日於秘書省暴書會宣示并以石本分賜取進止

辭免除同知樞密院事劄子

臣伏蒙聖慈除臣同知樞密院事特降中使宣押臣赴院治事者臣竊惟右府本兵為國樞鍵叅贊基命通號

籌帷之臣非德望素優不能厭服中外非才識兼裕不能洞照幾微若時詢求當慎厥與如臣一介器質吝蒙了無寸長濫竊名器叨塵簪橐貿歷歲時殊未能少効涓埃上裨海嶽而受祿過量顛覆是憂敢謂聖度并容宸聰過聽驟加甄拔登贊事樞內循養冥莫敢遑處伏望皇帝陛下驚蹇之乘不足以議遠途畀矜惻誠許辭重任仰惟聖天子垂衣御治四方黎獻雲集在廷一時名流底績者衆簡能而授殆不乏人倘回渙恩改賁者

彥使天下享任賢之福而朝廷由進德而尊則反汗雖若有嫌在盛時不為無補臣無任

初除乞減支賜銀絹劄子

竊以君賜甚豐必施於有德臣勞未著曷稱於隆恩伏念臣質薄無堪食浮有素以福基之庫淺當機地之邃嚴併加爵祿之崇舉為逾分復賜金縢之厚祇益覲顏方大君抑損以澄化原宜羣下精白以承休德儻乖辭富之義必蹈傷廉之譏矧如至愚尤戒多取所有臣初

除銀絹欲望聖慈特與依例減半支給庶遵近制允協
公言臣不勝幸願取進止

乞在外宮觀劄子

臣輒瀝危誠仰干睿聽伏念臣才竅質薄曾無寸長蒙
陛下覆育生成之恩擢自小官遍歷華省近登密命亦
已歲周殊未能少効涓埃上裨海嶽而受祿過量災危
乘之夏秋已來數苦脾疾心力隨耗蕭然不支雖欲強
勉班行深恐有誤委寄夙夜慙懼實不自安欲望聖慈

許臣解罷機政除一在外宮觀差遣儻或未填溝壑獲保餘生終當頂踵糜隕上報乾坤之造冒犯天威臣無任

第二

臣昨日嘗具劄子仰干天聽乞解機政除一在外宮觀差遣伏蒙宣押未賜俯從夙夕凌兢措躬無所今不免再伸前懇薦瀆宸聽伏念臣受才甚微叨寵過厚踐更筆橐登翊樞機惟蔓滋之是憂曾涓塵之無補深虞尸

素自速顛隲伏望聖慈早降處分冒犯宸極臣無任

第三

臣比嘗兩具奏劄僭陳危惓乞解罷機政除臣一在外
宮觀差遣天聽高邈寸誠未孚退而省愆夙夜震懼伏
念某濫陪機政無補事功期年之間積有瘵曠內之不
能彊本折衝以收薄效外之不能承命諭志以展微勞
憂愧相乘病疾交至若不亟求閒退深恐上誤眷知伏
望聖慈俯垂矜憫洞照誠懇特畀曲從瀝血叩閤期於

得請疊冒宸衷臣無任

第四

臣近具奏劄累申迫切之懇乞解罷機政除臣在外宮
觀差遣伏蒙聖慈特降詔書不允臣恭讀睿訓感懼交
懷伏念臣稟資冥頑慮事闇淺自塵機地茂著微勞無
制勝之籌何以助幄中之畫無解紛之略至於輟疆外
之行既衆誚其非才亦自知其獲罪已干清議難冒過
聯伏望天慈俯從人欲使得就閒于外闔戶省愆庶幾

未死以前捐軀論報屢黷宸聰臣無任

奏狀

輪當轉對奏狀

右臣恭惟皇帝陛下駿惠先猷丕昭孝治近以實錄院
修進徽宗皇帝實錄慶大典之崇成第史官之勞効凡
譔次編摩之士下逮掌故例霑醲賞恩至渥也繼又以
故翰林學士汪藻嘗修元符以來詔旨等書八百餘卷
於實錄最為有力特加褒贈優卹其子陛下此舉可謂

深合公論明燭幽隱矣然臣伏見紹興初嘗降指揮搜訪先朝文字投獻之家與斟酌高下推恩今來實錄成書竊慮二十餘年間臣僚子弟有以其父祖逮事先朝所得聖語等來獻事繫國體可以為萬世法者不可不少加甄錄伏望聖慈申詔有司檢會元降指揮令實錄院開具人數考覈事實擇其顯著者量與推恩以示勸獎是亦信賞不遺之義也謹錄奏聞俟候勅旨

繳進郊祀慶成詩狀

臣某等伏覩郊祀大禮慶成者恭惟皇帝陛下躬執百
禮逆釐三神曰雨曰暘天地明察以旦復旦日月光華
迄熙事之備成見聖人之能享臣等幸逢享會獲預駿
奔奏技非工莫繼甘泉之頌詠仁以報庶同嵩嶽之呼
謹各齋沐撰成詩隨狀上進臣等無任

辭免翰林學士知制誥奏狀

今月二十一日准尚書省劄子三省同奉聖旨除臣翰
林學士知制誥日下供職臣聞命震驚罔知所措竊以

翰林逼華蓋言其密直禁廷學士號私人得以與聞大
議此累朝甚盛之選在今日尤難其才恭惟皇帝陛下
煥文在躬典學成德間出命令親形詔書四方流傳萬
口詠歎咸謂觀天地之蘊不足喻其大真若處堯舜之
世而躬聆其言老師宿儒無能及者雅誥與義實自得
之豈繫小臣可奏薄技儻冒承於天獎必速致於人言
仰祈睿慈洞照忠款念其掌制之久已試而罔功察其
代言之疎不能則當止收還成命改授傑材庶在清朝

不至汙玉堂之位若安愚分是為酬黼黻之知所有恩命臣未敢祇受

辭免修國史奏狀

今月二十五日准敕以臣新除翰林學士知制誥兼修國史者臣聞命悚然益深戰懼臣竊惟史職有序皇朝率多以從臣兼之因其官遷亦俾類進茲為故事實待異能有如微臣器劣材謏寔之鰲禁既未能昭一代之文章授之麟臺豈足以訂三朝之筆削若叨疊組之命

愈負素餐之譏敢列悃誠薦祈淵聽亟鑄踰分之寵別
選兼人之才不惟於授受協公亦可使器名增重所有
恩命臣未敢祇受

謝宣召入學士院奏狀

今月初四日武功大夫翰林待詔錢奕至臣所居奉宣
聖旨召臣入院充學士者忽奉除書首紆瑤札適膺名
節趣直玉堂側聆溫詔之傳蹴就清班之入光榮過分
感懼交頽臣竊觀歷代聖仁之朝深慕當時翰墨之選

承明之廬敞於漢並萃軼材供奉之日更於唐始專內
命惟其出入侍從得以雍容揄揚故金馬之文炳同於
三代而黃麻之作深似于六經雖云所遇之殊時頗著
能言之實效相如不以俳優畜人懷來于喻蜀之辭陸
贄與有戡定功士感泣於奉天之詔迨本朝之稽古亦
公選之得人況值熙辰尤資碩望如臣末學於道寡聞
誦先人之清芬第拘口耳奏從官之薄技何補涓埃姓
名誤簡于九重職業徧揚于二代省言寔久罕有發明

論事雖疎必蒙開納方懷未報之歎復冒非常之遷此
蓋伏遇皇帝陛下學統聖真道經天地幹獨化于鈞陶
之上器羣才于橐籥之間既灼見于愚心遂曲垂于聖
獎禮優詞苑光動禁涂雖知稱職之難敢負酬恩之素
一心自擔九殞為期臣無任

辭免兼侍讀奏狀

今月十五日准尚書省劄子三省同奉聖旨差臣兼侍
讀者臣聞命震悸莫知所從竊以儒學之臣侍言帝幕

咨詢所逮實藉多聞用能揚榘古今敷陳治道究觀成敗上贊宸猷自非悖老名流豈得奉承清燕顧臣何有輒預選掄詞苑史闌已竭殊寵識迂辭拙不能發明舊章材朽業荒不能博曉奇字使之進讀懼弗克堪仰惟皇帝陛下天縱聰明日勤聚辨昕朝之暇經史是親講廟既多萬卷冰釋而猶不忘紬繹之助則所謂聖而益聖新而又新如臣至愚何以効塵露之補敢祈淵鑒追寢誤恩別簡耆英用符衆論所有恩命臣未敢祇受

謝賜御書奏狀

臣今月二十六日伏蒙聖恩賜臣御書玉堂二大字臣拜賜兢營感抃交至仰惟皇帝陛下聰明淵懿藝與道兼肆筆成書八法該備古帝王莫能跂及凡宸翰所賜赫然如大明委照卿藹騰輝四維廓氛千古流耀臣猥以翰墨待罪叨直禁林比於經緯因侍閒燕輒忘昧冒援淳化故事以為請退省瀆尊之咎跼蹐無以自容乃蒙天慈特賜俞允未踰信宿亟有寵頒盥熏捧觀寶墨

煥爛拭目詠歎莫知所云臣敢不勉勵微才答揚大賜
襲藏寶秘侈億萬年琬琰之傳遂為中興以來玉堂盛
事臣無任

繳進封事奏狀

臣伏見皇帝陛下自踐阼之初首降詔旨開廣言路以
通下情四方聞之丕應如響雖芻牧之賤皆得指陳利
害謦奏無壅聖德寬大兼聽博觀單言暫謀靡不延納
甚盛舉也臣智識淺陋罪廢滋久每自揆度不宜妄議

時事重惟頃歲服在朝列與聞機政憂國之心實不敢
以出處為間竊謂今日之事惟邊患未弭為朝廷深憂
捨此皆非當務之急輒有已見利便不避犯分之誅具
封事上進伏望聖慈俯垂乙覽察其誠款貸其狂瞽儻
有可采乞賜施行庶幾小効涓埃之補所有封事一實
封謹隨狀繳進以聞

海陵集卷五

欽定四庫全書

海陵集卷六

宋 周麟之 撰

表

進茶鹽法表

貨均於殖孰先山海之饒法存乎人爰定帝王之制本
一成而不變雖百世而可行承詔纂修奏篇趣備臣等
中謝竊以給軍頒之巨費仰惟貨之盈貲彌谷敷春但

資於天產熬波積雪亦分於地征措已合于時宜令固
當於夕改不有成憲將何靖民恭惟皇帝陛下知天之
為因民所利舜垂拱而坐視湯寬仁而信彰謂法猶江
河欲難犯而易避而政如金石果陳範以為程休茲一
代之倫講若九功之叙臣等佩服隆旨聯緝成篇莫殫
鉛槧之勞徒冒冕旒之鑒網提領振儻少冀于萬分國
富刑清庶共遵于三尺

請皇帝御正殿第一表

星文示變歟臨東井之躔聖慮省躬久避太微之座顧
已澄於象緯猶未正於昕朝爰暨有僚莫遑寧處恭惟
皇帝陛下道同天大聖以日躋雖克舜性仁靡恃欽明
之德而禹湯罪已每懷抑畏之心睹乾曜之異常念天
明之可戒乃不責股肱之情至自窮宵旰之勞宣布細
書退臨便坐貶玉食之大奉詢芻言而廣謀應天之實
既孚徇古之文盍已伏望皇帝陛下丕釐帝命俯察民
情詔司士以正儀御總章而布政清蹕而朝萬宇咸仰

睟容斂福以錫庶民率歸皇極

第二表

清臺觀象喜妖祲之廓然路寢避朝尚宸衷之惕若敢
肩戴后之恫輒冒憲天之聰淵鑒未回輿情胥篋臣等
中謝竊以聖人非見異而修德未占有孚天道每虧盈
而益謙其應如響比仰瞻於乾曜或稍拂於經躔睿王
側躬彌軫淵臨之懼下臣當政乃寬策免之誅靡移宣
夜之辰俄驗保章之吉蓋為仁由己莫非此道之素充

故以實應天遂致彼蒼之昭假未復寢饗之舊靡寧臣
庶之情伏望皇帝陛下夤念帝忱曲從民欲惟巖廊恭
己儼當南面之尊則海寓傾心長拱北辰之所願於衆
志俯畀俞音

第三表

五緯宣符既攝在躔之慝一人負宸盍臨當宁之朝迨
此造庭期於得請臣等中謝恭惟皇帝陛下大德敦化
至誠感神清明在躬久矣意誠而心正寅畏自度居然

害去而福來顧謫見之何憂恃身修之有素不移於民
不移於相懋昭責已之誠必得其壽必得其名丕享保
邦之慶已收塞變之效猶屈當陽之尊然蕃國貢琛將
展紫宸之覲而清宮獻竿佇厪黃道之行與其固執於
謙虛曷若順從於愛戴敢祈睿聽曲徇愚衷稱詔蹕以
出房正垂衣而御極惟治定制禮靡訾百辟之彛儀則
德隆晷星永見三辰之順度

賀表

舜璿齊政初占常次之愆湯德享天俄致異星之伏一
人席慶萬寓騰歡臣等中賀恭惟皇帝陛下至誠如神
大德必壽兢兢行堯帝之道魏乎有功翼翼秉文王之
心純亦不已茲復加於警懼曾何損於照臨言天者必
有驗于人惟知省己在君者固可移于相不忍加誅顧
盛美之難名宜妖妄之自殄臣等叨聯通服與覲休占
愧柱石之弗勝何陰陽之能理熒惑徙心而退舍福實
有歸輔星佐斗以成功義當自竭願首四方之賀益申

萬壽之期

賀正表

寶曆推元肇啟陽闔之旦璇杓布令允當物覩之辰宜
頌康年以綏介福恭惟皇帝陛下至仁天覆大化春敷
受命穆清永膺千歲之統協神醇樸坐陟三皇之閔御
人正以更新擁春祺而錫羨臣等幸逢端月叨贊盛朝
行夏之時獲共循於天紀祝嘉之壽願益固於邦圖臣
等無任

謝除中書舍人表

臣某言俯結絲綯方竊禁庭之侍進持荷索遂叨詞掖
之除成命莫回大恩曷報臣

中謝

伏念臣藐焉一介少

也百罹技斷斷以無他志卑卑而自勉蠹漫舊簡空懷
闕管之心草鞠先疇坐縮扶犁之手頃陪後進濫齒周
行鷁過都而退飛風為之崇馬立仗而斥去人惡其鳴
幸逢公道之興祇拜召書之寵叨纂修於東觀愒日何
功司記注於西垣兼官更渥愧攝承之已冒省蕪顙之

良多久懷不稱之憂忽玷為真之命此蓋伏遇皇帝陛下網羅衆俊摩礪庶工煥乎其有堯文如天之大祭然而興周道得士以昌顧雖椶闌之材與被冕旒之眷臣敢不懋明聖意思大王言才華雖近愧于長楊體要欲上規于姚姒更期文學之士咸精其能庶幾播告之修不匿厥指臣無任

謝除兵部侍郎表

黼座對敷方圖於猷告玉音宣諭忽冒於恩除感榮遇

之非常慚謗才之曷稱臣中謝竊以六卿置貳並高豹
尾之聯兩禁用人尤邃鑒坡之直任而得一寵已云殊
矧二命之同頒更九重之親擢必惟鴻碩之彥允副聖
神之知如臣者樸學無聞竊言何用雕蟲小技皆揚子
之不為腊鼠虛名亦鄭人之過聽寢叨華貫誤簡淵衷
自賜環而來歸獲持索以入侍螭坳濡墨但知臨陛之
恭鳳閣演綸初乏湧泉之思至若紬書金匱視草玉堂
才學識靡効其一長渾灝盡莫追於三代惟日負素餐

之愧迺面承華袞之褒改畀清曹仍司內命顧始望未
嘗及此使自謀何以過之茲蓋伏遇皇帝陛下至誠與
賢常德立武威械藏而俎豆布永觀二柄之歸元首明
而股肱良坐致百工之飭治道既弛張之各當人材亦
長短之無收姑令翰墨之臣預知軍旅之事臣敢不力
鞭駑鈍瘡竭涓埃雖馬上之與詩書粗明當務謂禁中
之有頗牧終恐非才臣無任

進徽宗實錄表

伏以燕謀啟後仰萬世之閔謨嗣德昭先輯一朝之鉅
典惟興王克紹聖統致太史訖成全書恭陳簡冊之嚴
冒徹冕旒之選臣某等

中謝

臣聞聖明潤色洪業有光

謨烈之承典籍垂法將來式謹事辭之載歷考繼文之
代具存傳信之書述作相因古今共貫恭惟徽宗體神
合道駿烈遜功聖文仁德憲慈顯孝皇帝孝繩祖武仁
體乾元其智如神昭徹天人之表以身為度裁成禮樂
之中御圖錄二十六年受符瑞數千百所極治之風炳

同於三代高世之德遠比於九皇黃屋非心自能為脫
展之舉白雲賓帝詎止寶遺弓之傳惟於廣記而備言
可以觀光而揚烈皇帝陛下行高繼志功極格天見堯
於羹居每勤乎孝慕纘禹之緒時載郁乎文明爰庀攸
司具嚴直筆覽奏篇之半尚博采於三長念愒日之多
至叟逾於七閏臣等粗殫忠赤甫及汗青補藝以成一
家庶可追於往作廣愛而刑四海端有賴於斯文所有
徽宗皇帝實錄一部謹繕寫隨表上進以聞

謝除給事中表

臣某言伏奉告命授臣試給事中仍賜紫衣金帶者夏
官升貳曾煖席之未遑夕瑣改除顧循牆之莫避恩由
聖造感極愚衷臣中謝伏念臣奏技無堪登朝最晚性
惟駑緩常有意於佩弦迹本賤庸亦何勝於簪筆徒以
久陪於法從屢荷密拱於清光坐閱三年遍歷兩禁悉
自九重之簡記無非一札之親除方戴恩私未知報所
復易論思之地俾聯封駁之司望黃散之清班所居彌

要考塗歸之故事厥責匪輕敢圖巽懦之資亦玷高華之列此蓋伏遇皇帝陛下鼎新大化器使羣才獨優棧樸之能官更懋菁莪之樂育謂用人猶制木雖根闌在所兼收儻從善如轉圜則涓塵不無小補欲張吾道尤重此官故凡選任之賢孰非自擢每有封還之詔無不曲從惟其言聽而計行是以體嚴而望峻豈容尸祿負此隆知又忌好名率然妄發臣敢不求之公論濟以慎思誦揚子之解嘲已自知其過分效李藩之批勅庶或

繼於前芳臣無任

謝賜對衣金帶鞍馬表

臣某言伏蒙聖恩以臣入院特賜衣一對金腰帶一條金鍍銀鞍轡馬一匹者身章襲紫爛若兼金廢乘飛黃飾之鉤轡望嚴宸而拜貺顧朽質以懷慙臣

中謝

伏念

臣起於布韋叨與簪橐荷聖明之簡拔致爵祿之僥踰然其骨相酸寒僅如魯國之一逢掖性資駑下豈識唐公之兩驂驪幸際炳文之朝獲陳稽古之力便蕃所逮

俯俸奚勝此盖伏遇皇帝陛下三接禮賢五章命德推解衣之大惠示賜馬之明恩束帶使言既增華於著定著鞭自勵當盡瘁於馳驅臣無任

謝除翰林學士表

臣某言伏蒙聖恩除臣翰林學士知制誥者三年禁路久塵豹尾之班一札優恩驟玷鰲頭之直揣才非稱受寵若驚臣中謝伏念臣地望素寒天資甚窳半生鼠技固已類於五窮萬里鵬程敢自期於一息濫綴影纓之

末猥從結綬之初周旋每近於清光盼睐獨多於從列
凡叨甄擢盡出簡知屢形華袞之褒仰識大明之照忽
盼隆指遂陟禁林竊考中興以來尤嚴內制之選未嘗
官備足見才難故金鑒之庭正員纔逾二十輩而翠琰
所紀虛席蓋已三數年豈容賤疵輒冒清切念干戈之
載戢覺翰墨之無功書詔甚稀書樂鈐條之寂詔詢愈
密夜慚跋燭之光夫何晚生有此亨會茲蓋伏遇皇帝
陛下憲章六學網紀四方雲漢昭回揭儀刑以見天則

雷風鼓舞孚號令以悅民心欲令承學之臣助起烈文
之治臣敢不少圖實用上副詳延煥乎堯帝之有文章
本不資于潤色責以燕公之大手筆徒自愧于濡毫唯
夙宵而盡忠以頂踵而歸報臣無任

謝兼侍讀表

臣某言伏奉告命授臣兼侍讀者大筆幾聞猥玷承明
之直細旃垂聽復叨勸誦之官奉詔知榮捫襟失措臣
中謝伏念臣草茅賤士鉛槧迂儒智不逮人顧何知於

亥豕才非適用徒自困於蟲魚雖云居翰墨之司豈足
語帝王之學幸廟朝之多暇當書詔之絕稀每闕一札
之下頒悉由宸訓至效八軌之晚入深愧素餐忽紆命
綽之優俾侍經帷之邃鳳泉賜啜日旣君恩玉案繙書
躬承聖問夫何光渥併及妄庸此蓋伏遇皇帝陛下其
仁如天以古為鑑躬聖人之能事莫匪生而知之覽載
籍之備陳固已識其大者猶魚收於小善用益廣於多
聞拔此孤蹤登于近綴臣敢不溫煥舊業展竭愚衷誦

班史之文章雖莫追于述作陳漢家之治道庶有沃于
咨詢臣無任

辭免除同知樞密院事表

臣某言伏蒙聖慈以臣辭免新除同知樞密院事恩命
特降詔書不允者異恩簡畀理有必辭優詔申褒令惟
弗反敢冒崇高之聽復殫懇惻之誠臣中謝伏念臣最
爾小儒陶于鴻化枯荄已撥俄遂底于再生小器易盈
亦豈容于多受猥荷聖神之眷遍塵清切之班文章不

足以潤飾皇猷識畧不足以裨贊國論方虞幽黜忽被
峻遷升兩地之官聯翊萬微之事任當英主操天下之
柄立武有常非傑臣助幄中之籌折衝何賴豈賢愚菴
可副柬求伏望皇帝陛下大智獨觀至明旁燭察臣樗
材甚陋力有弗勝憐臣鼠技既窮用之無補特改已行
之命少紓不稱之訶瀝此由衷期於得請臣無任

除同知樞密院事謝表

臣某言伏奉告命除授臣同知樞密院事尋具辭免伏

蒙聖慈特降中使賜臣不允批荅仍斷來章者昭回降
札驟登列於紫樞俯僂循牆累具陳於丹悃洵拜如絲
之首難停已霑之恩冒寵不貲措躬無所臣


中謝

竊以

文武並用之道祖宗相傳之規觀其于右府擇人莫匪
與真儒共事如醫治國以砭劑而拯庶民如斗在天以
樞機而幹元氣自非通於道而知本末之序遽於識而
達弛張之宜則安能應酬萬微該輔七德必求名世之
彥以起憲邦之功如臣者天與隘疎地由寒遠智挈瓶

而甚小學浚井以弗深抱慙懷鉛空言何補持橐簪筆
歷試罔功居然日月之虛糜積有器名之濫假自躋禁
路每歲一遷旋蹈複門兼官四所皆以蠅而附驥殆不
稼而取禾初乏才稱聯聽履于星辰之上忽叨柄任贊
運籌于帷幄之中方此謹邦惠以戒不虞欲其佐廟謨
以恢至治豈容末學妄測沉幾茲蓋伏遇皇帝陛下受
命于天用人惟已堯仁廣被不戰而屈人兵周道復興
有常以立武事收摯四方之豪俊輔成億世之基圖藐

是孤蹤甄於大造臣敢不對揚丕訓庠厲謏材詭一割
以効愚展四體而率職庶幾夙夜基命少裨宥密之謀
當使精神折衝共固安疆之業臣無任



海陵集卷六